

23. septemperi 2016

UKA2016/122

**Siunnersuut uunga: Imigassat aalakoornartortallit pillugit Inatsisartut Inatsisaat nr. xx, ulloq xx.xx 2016-imeersaq**

Inatsisartut inatsisissaattut siunnersuut tassalu imigassat aalakoornartullit pillugit tamannalu isummorsorfissaq matumuuna saqqummiussaqaasaagut.

Nunatsinni ulluinnarni inuuniarnikkut atukkagut assorujussuaq ilungersunartumik inissisimapput. Meeqqanik sumiginnaanerit, imigassartorpallaarnerput aangajaarniutinik atuinerit ajornartorsiutigaagut tamakkulu qaangerniarnissaanut peqataarusuppugut.

Imigassat aalakoornartullit ajoraluartumik nunatsinni atugaasorujussuupput tamannalu ajornartorsiutigaarput isertuunneqarsinnaanngitsumik, ilaqtariippassuit inuuniarnikkut atukkatsigullu ajornartorsiuteqarpugut, isumaginninnikkut, aammalu meeqqanik sumiginnaanikkut inuunerlunnermik inuuneqarpugut akuersaarneqarsinnaanngitsumik.

Iluoortumik akuersaarsinnaanngilarput inuusuttuararpassuit imigassartorlutik putummattarnerat, ilami allaat oqaatigineqartarpoq meeqqanut allaat imigassartortartut tamannalu akuerineqarsinnaanngivippoq, tamannalu annertuumik pinaveersaartillugu suliniuteqartariaqarpugut, uagullu inersimasut imigassartornerup millisarnissaanut maligassaanerulertariaqarpugut imigassartorpallaarpugut pissutsillu taamaannerat allanngortilluinnartariaqarparput.

Meeqqanut inuusuttunullu nuannaartunarnerusumik inuunerissaarnerulluta inuuneqalertariaqarpugut isigisitsinerpummi ilaatigut kusanarpallaarneq ajormat.

Inatsisissatut saqqummiunneqartoq sorpassuatigut eqqartugassartaqarpoq tassami inatsisissami ilaatigut saqqummiunneqartut soqutiginarortaqaarput, pingaartumik pisiniarfiit annerusut immikkut inimik imigassarsiniartarfeqarnissaat tapersersornarmat.

Taavalu pisiniarfiit minnerit imigassat asserlugit imigassaarniartalissapput, taavami kioskit mikisunnguit qanoq periarfissinneqassappat ersinngitsumik imigassarniarnissaminut, tamannalu paaserusunnarpoq qanoq iliorfigineqassanersut.

Tassami ilaatigut nuannerpallaarneq ajorpoq pisiniarfinni imigassarsiniartut ilaatigut torersaarpallaanngitsumik pissusilersortut pingaartumik ilaqutariit meerartallit pisiniarfinni pisiniartillugit tamakkua meeqqanut takutillugit tusaatillugillu ajorluinnarmat.

Isumaartoqaruni imigassat ammasarfii sivisunerulerpata eqqissinarnerusumik imigassartuulissasugut, tamanna eqqoriaanertut taagaanni uniorpallaarunangilaq, tassami imigassartornissamut periarfissat annerulissapput putumanissamut periarfissaq sivitsussaaq tamannalu ilumoorpoq.

Isumaartoqaruni imigassat ammaneri sivitsorpata meeqqanik sumiginnaanerit minnerulissasut, ilami isumaartoqaruni unnuarsuarmut putummattarneq minnerulissasoq tamanna eqqorpallaarunangilaq. Ilami isumaartoqaruni imigassarsiniarneq sivitsorpat imigassartorsimasut innajaarnerussasut tamanna ilimanarpallaanngilaq. Imigassarsiniarneq imigassartorsinnaanerlu sivisunerulerpat qularnanngitsumik aamma eqqissivilliornerit annertusissapput.

Imigassanik pilerisaarinerit ussaasaarinerillu atuukkunnaarsinneqarnissaat ajorinngilluinnarparput, takusinnaasagummi malikkaanni imigassanik vinniillu ussaasarinerit annertullutillu naliginnaasorujussuummata inerteqqutaalernissaanik saqqummiussaqrneq isumaqatigaarput.

Imerniartarfinni imigassarniarnermut tunngasoq tassalu ullaassakkut tallimanut matusalissapput qularnanngilarlu amerlassut arfinernut matusalissapput. Taamak sivistutisumik ullaassamut imerniartarfinni imigassaarniartarnissaq isumaqatiginagu oqaatigissavarput.

Taamatut oqaaseqarluta ataatsimiititaliami susassaqtumi suliarineqarnissaa innersuussutigaarput.

Hans Enoksen

